

桑

志

桑志卷第四

海鹽李聿求五峯甫簃

桑之具

物以利用器各攸殊求桑不僅以懿筐躬桑必  
嚴其車服類而敘之昭慎重也志桑之具第四  
詩豳風女執懿筐遵彼微行爰求柔桑

詩豳風取彼斧斨以伐遠揚傳斨方盞也

周禮天官內司服鞠衣注鞠衣黃桑服也色如鞠塵象  
桑葉始生

周禮春官巾車翟車貝面總有握注翟車不重不厭以

羽飾車之側后乘以出桑者貝面謂以貝飾之當面其總以繒而以縹其上則有幄而無蓋焉

禮記月令季春之月天子乃薦鞠衣于先帝鄭元注鞠衣黃桑之服

禮記月令季春之月命野虞毋伐桑柘鳴鳩拂其羽戴勝降于桑具曲植籩筐

呂氏春秋月令高誘注曲三輔謂櫜關東謂之得青徐謂之曲圓底曰蒙方底曰筐皆受桑器

阮譔禮圖乘輅后法駕乘之以親桑

晉書天文志扶筐盛桑之器主勸蠶也

晉書禮志皇后著十二笄步搖衣青衣乘油蓋雲母車  
駕六驍馬女尚書著貂蟬佩璽陪乘載筐鉤

案輿服志云雲母車以雲母飾犢車犢車駕牛  
北齊書后因親桑服鞠衣乘重翟

隋書皇后采桑衣鳩衣乘翟輅命婦采桑齋及還衣黃  
衣

孔帖后翟車采桑

大唐開元禮尚功執鉤司制執筐

唐書上元二年楚州獻寶玉曰皇后桑鉤如箸屈其末  
明史洪武十三年令天下人民每村置一鼓凡遇農桑

時月晨起擊鼓

齊民要術春採桑必須長梯高杙

案王禎農書杙作几

士農必用擔簣高几遶樹上下

王禎農書桑梯說文曰梯木階也夫桑之穉者用几採摘其桑之高者須梯剗斫梯若不長未免攀附勞條不還則鳩腳多亂樛枝折垂則乳液旁出必欲趁高下隨意去畱須梯長可也

王禎農書桑几狀如高杙平穿二桄就作登級凡柔枝未免攀附須登几上乃易得葉今蠶家采彼女桑茲

爲便器

王禎農書斫斧桑斧也其斧鑿匾而刃闊與樵斧不同凡斧所剗斫不煩再刃者爲上至遇枯枝勁節不能拒遏又爲上如剛而不闕利而不乏尤爲上也然用斧有法必須轉腕回刃向上斫之枝查旣盛則津脈不出

案北俗桑堅宜用斧南俗桑柔宜用剪桑剪頭須寸半股六寸而直隨意翦去則桑條自落余有句云剪刀聲裏落桑條言其易也

王禎農書桑鉤采桑具也凡桑者欲得遠楊枝葉引近

就摘故用鉤木以代臂指扳援之昔者親蠶皆筐鉤采桑唐上元初獲定國寶十三內有采桑鉤一以此知古之采桑皆用鉤也然北俗伐桑而少采南人采桑而少伐歲歲伐之則樹脈易衰久久采之則枝條多結欲南北隨宜采斫互用則桑斧桑鉤各有所施故兩及之

王禎農書桑籠大箒也卽今謂有係筐也桑者便于攜挈古樂府云青絲爲籠繩桂枝爲籠鉤今南方桑籠頗大以擔負之尤便於用

案浙西有桑筥與筐圓而又小宋梅堯臣桑筥

詩云采采向桑郊盈盈自持筥言輕便也又有桑筥其制與籠稍異高三四尺徑三尺以粗竹筠爲之

類篇初治桑刀

蠶經切葉之刀宜闊而利

王楨農書切刀斷桑刃也蠶蟻時用小刀蠶漸大時用大刀或用漫鋤蠶多者又用兩端有柄長刃切之名曰懶刀懶刀如皮匠刮刀長三尺許兩端有短木柄以手按刀半裁半切斷葉雲積可供十筐先于長橈上鋪葉勻厚人于其上俯案此刀左右切之一刃之利可桑百箔



王禎農書桑網盛葉繩兜也先作圈木緣圈繩結網眼  
圓垂三尺有餘下用一繩紀爲網底桑者挈之納葉  
于內網腹既滿歸則解繩傾之或人挑負或用畜刀  
馱送比之筐盤甚爲輕便北方蠶家多置之

王禎農書桑碓爾雅曰碓謂之摏郭璞曰碓木礪也碓  
從石機從木卽木碓也碓截木爲碓圓形豎理切物  
乃不拒刃此北方蠶小時用刀切葉碓上或用几或  
用夾南方蠶無大小切桑俱用碓也

案吾鹽桑碓皆用稻柴爲之狀如打紙碓用木  
恐傷葉其制頗佳

王禎農書剗刀剗桑刃也刀長尺餘闊約二尺木柄一握南人斫桑剗桑俱用此刃北人斫桑用斧剗桑用鐮鐮刃雖利終非本器殆不若剗刀之輕且順也若南人斫桑用斧北人剗桑用刀去短就長兩爲便也王禎農書桑夾挾桑具也用木磧上仰置叉股高可二三尺于上順置鐮刃左手茹葉右手按葉刃切之此夾之小者若蠶多之家乃用長椽二莖駢豎壁前中寬尺許乃實納桑葉高可及丈人則躡梯上之兩足後踏屋壁以胸前向壓住兩手緊按長刃向下裁切此桑夾之大者南方切桑惟用刀砮不識此等桑具

故特歷說庶倣用以廣其利

志卷第四

桑志卷第五

海鹽李聿求五峯甫簣

桑所宜

九州之土皆宜桑而志乘或不備載茲錄之以  
見地利所出衣被無窮志桑所宜第五

書兗州桑土既蠶

書青州厥筐壓絲蘇軾傳壓桑出東萊

詩鄘風期我乎桑中

詩鄘風降觀于桑

詩鄘風星言風駕稅于桑田

詩衛風桑之未落其葉沃若

詩衛風桑之落矣其黃而隕

詩鄭風無踰我牆無折乎我樹桑

詩魏風彼汾一方言采其桑

詩魏風十畝之間兮桑者閑閑兮

詩魏風十畝之外兮桑者泄泄兮

詩唐風肅肅鳴行集于苞桑

詩秦風阪有桑

詩秦風交交黃鳥止于桑

詩曹風鳴鳩在桑

詩豳風蠶月條桑

詩豳風蜎蜎者蠋烝在桑野

詩小雅南山有桑

詩小雅黃鳥黃鳥無集于桑

詩小雅維桑與梓必恭敬止

詩小雅隰桑有阿其葉有難

詩大雅苑彼桑柔其下侯甸

史記齊帶山海膏壤千里宜桑

史記鄒魯濱洙泗頗有桑麻之業

史記沂泗水以北宜桑麻

史記齊魯千畝桑其人與千戶侯等

漢書地理志秦地好稼穡故園詩言農桑甚備

漢書地理志魯地頗有桑麻之業

漢書地理志粵地女子桑蠶織績

蜀志諸葛亮白表後主曰成都有桑八百株

齊書扶桑國在大漢國東二萬餘里土多扶桑

唐書李襲譽常謂子孫曰河內千樹桑事之可以衣

山海經西次經鳥山其上多桑

案鳥山疑卽陝西安定縣西南泰重嶺辱水逕  
其北縣南四十里有鴉鵠山或卽古之鳥山歟

山海經北次經洹山其上多三桑生之其樹皆無枝其  
高百仞

山海經東山經姑兒之山其下多桑

山海經東山經嶽山其上多桑

山海經中次經輝諸之山其上多桑

山海經中次經穀山其下多桑

案穀山水經注云在河南澠池縣南太平寰宇  
記云澠池縣穀山在縣南八十里

山海經中次經大堯之山其木多桑

山海經中次經隅陽之山其木梓桑



山海經中次經視山其上多美桑

山海經中次經雞山其上多桑

山海經中次經雅山其上多美桑

案雅山漢書注引經作雉山經云澧水出焉地理志云南陽雉縣漢雉縣以山得名太康地理志以出南陽雉縣漢雉縣以山得名太康地理志以爲有陳倉寶雞故名雉疑誤

山海經中次經宣山其上有桑焉大五十尺其枝四衢其葉大尺餘赤理黃華赤柎名曰帝女之桑

案宣山水經注云在河南泌縣界今失名

山海經中次經衡山多桑郭璞注云在衡陽湘南縣南  
嶽也

山海經中次經豐山其木多桑

案豐山太平寰宇記云南陽縣廢向城縣本漢  
西鄂縣地有豐山

山海經中次經夫夫之山其木多桑楮

山海經中次經卽公之山其木多桑

案卽公山史記集解姚氏引經作卽山

山海經中次經陽帝之山其木多檠

山海經中次經柴桑之山其木多桑郭璞注云在潯陽

柴桑縣

山海經海外北經歐絲之野一女子據樹歐絲三桑無枝在歐絲東其木長百仞無枝

山海經海外北經陽谷上扶桑十日所浴

山海經大荒北經赤澤水名曰封淵有三桑無枝

管子五粟之地宜其壓其桑

管子五沃之地宜彼其桑

管子五位之地皆宜其桑

管子黃唐無宜也其木宜擾桑

范子計然桑出三輔

後燕錄晃之遷于龍城植桑爲社主及秦滅燕大風吹  
拔後數年度社處忽有桑根二生焉先是遼川無桑  
及槐通于晉求種江南平川之桑由晃始也

桑志卷第五

桑志卷第六

海鹽李聿求五峯甫簣

桑所植

既憑地力亦假人工得之則栽培失之則傾覆  
古人講理栽桑亦纖悉不可苟矣志桑所植第  
六

齊民要術桑柘熟時收黑魯椹卽日以水淘取子曬燥  
仍畦種

陳旉農書若欲椹子則擇美桑種椹每一枚翦去兩頭  
兩頭者不用其子差細以種卽成雞桑花桑故去之

惟取中間一截以其堅栗特大以種卽其幹強實其  
葉肥厚故存之所存者先以柴灰掩揉一宿次日以  
水淘去輕秕不實者擇堅實者略曬乾水脈勿令甚  
燥種乃易生

汜勝之書種桑法五月取椹著水中卽以手漬之以水  
洗取子陰乾治肥田十畝荒田久不耕者尤善好耕  
治之每畝以黍椹子各三升合種之黍桑當俱生鋤  
之桑令稀疏調適黍熟穫之桑生正與黍高平因以  
利鎌摩地刈之曝令燥後有風放火燒之桑至春生  
一畝食三箔蠶

四時類要種桑如種葵法土不得厚厚卽不生待高一尺又上糞土一徧

陳旉農書擇肥壤土鋤而又糞糞而又鋤如此三四轉踏令小緊平整了乃于地面勻薄布細沙約厚寸許然后于沙勻布槌子令疏密得所下子了又以薄沙摻蓋其上卽疎而易生芽蘖不爲泥食腐而根漸下所踏實者肥壤中則易以茂矣每畦闊叁尺其長稱焉一畦只可種四行卽便于澆灌又易採除草畦上作棚高三尺棚上略薄著草蓋卻如種薑棚樣以防黃梅時連雨後忽暴日曬損也待苗長三五寸卽勤



剔去根幹四傍樸蔽小枝葉只存直上者幹標葉五日一次以水解小便澆沃卽易長

務本新書四月種椹

二月種舊椹亦同

東西掘畦熟糞和土糶

平下水水宜濕透然後布子或和黍子同種椹藉黍力易爲生發又遮日色或預于畦南畦西種糶後藉糶陰遮映夏至長至三二寸旱則澆之若不雜黍種須旋搭矮棚于上以箔覆蓋晝舒夜捲處暑之後不須遮蔽至十月之後桑與黍穉同時刈倒順風燒之仍糝糞土蔽灰春暖榮茂次年移栽

務本新書一法熟地先耩一壠另搓草索截約一托以

水浸軟麪飯湯更妙索兩頭各歇三四寸中間勻抹  
濕椹子十餘粒將索臥于黍壠內索頭以土厚壓中  
間糝土薄覆隔一步或兩步依上臥一索四面取齊  
成行久旱宜澆十月刈燒加糞如前冬春擁雪蓋糞  
清明前後掃去霖雨時覲稀稠移補比之畦種旋移  
省力決活早二年得力如舊有椹春種更妙後宜築  
圍牆固護或慮索繁碎以黍相和于葫蘆內點種過  
處用簍掃勻或慮天旱宜就黍壠內撥土平勻順壠  
作區下水種之

務本新書又法春月先于熟地內東西成行勻稀種糝

次將桑椹與蠶沙相和或炒黍穀亦可趁逐雨後于  
隸北單耕或點種比之搭棚與黍同種緣隸陰高密  
又透風露雖種數十畝亦不甚委曲費力

士農必用種子宜新不宜陳

新椹種之為上隔年春種多不生蔭畦搭棚為上

麻次之黍苗又次之

桑芽出間令相去五七寸

營造尺寸頻澆也他做此

過伏可長至三尺

割去

至十月內附地割了撒亂草

走火燒過

火不可大恐損根

糞草蓋至來春杷耬去糞草澆

每一科自出芽三數箇畱旺者一條

已成根則不須蔭可頻澆

秋魯桑可長五七尺荆桑可長三四尺

魯桑可移為地桑荆桑可

移入園養之

種樹書桑以構接則桑大根下蘊龜甲則茂盛不蛀  
種樹書浙間植桑斬其葉而植之謂嫁桑卻以螺殼覆  
其頂恐梅雨侵損其皮故也二年卽盛

案種桑以稀爲貴其性喜燥以河泥覆之最爲  
有功河泥之地土堅而鬆雨過卽乾

陳勇農書至當年八月上旬擇陽顯滋潤肥沃之地深  
鋤以肥窖燒過土糞以糞之則雖久雨亦疏爽不作  
泥淤沮洳久乾亦不致堅硬磽确也雖甚霜雪亦不  
凝凜凍沍治溝壟町畦須疏密得宜然後取起所種  
之苗就根頭盡削去榦只畱根又削去對條直下者

命根只畱四傍根每三根合作一株若品字樣繫縛一竹筒底下筒各長三尺大如腳拇指盡剝去中心節令透徹底一一繫縛了然後行列并竹筒植之可相距二尺許一株俾三根日久竹筒朽腐自然三榦合爲一榦以三根共蔭一榦植未逾數月榦力專厚易長大矣每一竹筒口尋常以瓦子一片蓋卻免雨水得入漬爛之也覺久須澆灌卽揭起瓦片子以瓶酌小便從竹筒中下直至根底矣澆畢依前以瓦片子蓋口但不必如前種苗樣作棚也又須時時摘去榦之四傍枝葉謂之妒芽恐分其力以害榦

務本新書夫地桑本出魯桑若以魯桑萌條如法栽插  
揀肥旺者約畱四五條鋤治添糞條有定數葉不繁  
多衆葉脂膏聚於一葉其葉自大卽是地桑

務本新書栽地桑法秋後於熟白地內深耕一犁就壟  
加糞撥土爲區如無牛掘區亦可春分前後取臘月  
所埋桑條

埋條法  
如後

揀有萌芽處各盤七八寸或一尺

鍤區下水臥條栽之覆土約厚三四指深厚則難生  
以手按勻區東西種雜五七粒五月之後芽葉微高  
旋添糞土已後條高便作地桑或揀魯桑草兒秋間  
埋頭深栽更疾得力

士農必用地桑之功惟在治之如法不致荒燥

無樹桑之家純

用地桑則人力倍省有樹桑兼地桑之家樹葉既成地桑可止而勿用加澆鋤之功使之滋長至其豎大眠之後或樹桑不能時至則可就取地桑補之豎至終老不致闕食

士農必用布地桑法牆圍成園將園內地或牛犁或鐮

斷熟方五尺內掘一坑

內地一畝合栽一百四十科

方深各二尺

坑內下熟糞三升

生糞不中壯地不用

和土勻下水一桶調成

稀泥將畦內種成魯桑連根掘出一科自根上畱身

六七寸其餘截去截斷處火鏃上烙過每一坑栽一

根將根坐於泥中

欲疾見功者栽二根

按至坑底提三五次

欲令

根須舒順按桑身頂與地平擁周圍熟土令坑滿次日築

實

匝阮四邊築下土至半阮根下土不相著多懸死上半阮攪熟土

輕築已平滿

附身土不可築實實則芽難生用虛土封堆如大鏹子

樣可厚五七寸周圍自成環池

水澆於內芽出虛土四五

指每一根止畱一二條

澆鋤如法當年可長五尺餘次年附根割

條葉飼蠶

須用厚背剛鎌一割要斷鈍鎌一割不能斷則條楂不齊雨浸傷根地桑不宜放出

身只要條從土中長出身出土名為腳割過處每一

高身上所長條不旺又多被風雨擺折根盤周圍數芽出每一科可計畱四五條餘者間去

年年附地割之根漸旺畱條漸多野魯桑根科栽之

亦可

全如前法地桑三年後正長旺五年後根相交根交則不旺春時將相交根斫斷掘去添土糞

土或澆過或得雨即復長旺次後斟酌其根欲大將壓成栽子圍別園如前法栽之三年後新桑茂盛養



蠶所桑時將舊桑根上只留一條隔年自成一樹分出栽為行桑如此傳轉無有盡期然魯桑所飼蠶其絲少堅韌可斟酌栽荆桑樹於大眠後取葉間飼之

韓氏直說地桑須於近井園內栽之有草則鋤無雨則澆比及蠶生可澆三次其葉自然早生桑種自有早生者遲生者

須擇其早生者為地桑則可

齊民要術明年正月移而栽之仲春季春亦得率五尺一根大都

種樁長遲不如壓枝之速無栽者乃種樁也其下常斷掘種菜豆小豆豆

良美潤澤益桑栽後二十年慎勿採沐小採者長倍遲

務本新書桑生一二年脂脈根株亦必微嫩春分之後

掘區移栽區北直上下栽成土壁壁底旁鍤其土下

水三四升將桑葚兒靠壁栽立根科須得勻舒以土  
堅覆土壁比區地約高三二寸大抵一切草木根科  
新栽之後皆惡搖擺故用土壁遮禦北風迎合日色  
務本新書今時移栽小桑微帶根鬚上無寸土但經路  
遠風日耗竭脂脈栽後難活縱活亦不榮旺卻稱地  
法不宜此係拙謬今後應栽小樹若遠移多約十餘  
樹通爲一束於根鬚上蘸沃稀泥泥上糝土上以草  
包或席包內另用淳泥固塞仍擗夾車箱兩頭不透  
風日中間順臥樹身上以席草覆蓋預於栽所掘區  
下糞樹到之時便下水依法栽培

務本新書秋栽法平昔栽桑於多春月全樹移栽春多

大風吹擺加之春雨艱得又天氣漸熱芽葉難禁故

多不活

活亦遲  
得力

若是斫去元榦再長樹身桑間鐵腥

愈旺地桑是其驗也迤南地分十月埋栽河朔地氣

頗寒故宜秋栽

霖雨內  
爲上時

區深一尺之上平地約畱樹

身一二指餘者斫去栽罷地須堅築以土封瘕比及

地凍於上約量添糞春暖之後就糞撥爲土盆雨則

可聚旱則可澆樹南春先種棘比及霖雨以來芽條

蓊茂就作地桑或削去細條存畱旺者一二枝次年

便可成樹或是就壓傍條一樹又生十餘比之全樹

栽者樹樹必活桑亦榮茂

務本新書十月木迷宜栽埋頭桑

截去桑身栽如秋栽法

冬月根

脈下行乘春併發一年之間長過元樹

務本新書栽二年之上其間但有芽葉不旺者於穀雨時以硬木貼樹身去地半指一斧截斷快鏘更妙糝土封其樹癰樹南種黍五七粒十餘日如出芽條旱則頻澆立夏之後不宜此法

務本新書一歲之中除大寒時分不能移栽其餘月分皆可

農桑要旨平原淤壤土地肥虛荆桑魯桑種之俱可若

地連山陂土脈堅硬只宜荆桑又初栽後成科時中心長條上葉勿採其餘在傍腳科止將其葉且勿剗斫蓋令枝葉繁密就爲藩蔽以防牛畜咬損犁擺拖挽之患後中心枝旣麤卽可剗斫在旁科條本根旣盛脂脈盡歸中心枝便可長成大樹堅久茂盛不生糖心

陳莧農書於次年正月上旬乃徙植削去大半條幹先行列作穴每相距二丈許穴廣各七尺穴中填以碎瓦石約六七分滿乃下肥火糞三兩擔于穴中所填者碎瓦石上然後于穴中夾植一株下土平填緊築

免風搖動更四畔以椀足大木子四五條長三尺餘  
斫塹周迴牢釘以補助其榦仍以棘刺絆縛遶護免  
牛羊挨拶損動也根下得瓦石卽虛疏不作泥糞落  
其中又引其根易以行待數月根行矣乃于四傍以  
大木斫塹周迴釘穴搖動爲十數穴穴可深三四尺  
又四圍略高作塘塍貴得澆灌時不流走了糞且蔭  
注四傍直從穴中下至根底卽易發旺而歲久難摧  
也又時時看蟲恐蝕損仍剔摘去細枝葉謂之妒條  
若桑圃在曠野處卽每歲於六七月間必鉏去其下  
草免引蟲援土蝕損至十月又併其下腐草敗葉鉏

轉蘊積根下謂之薶蔴最浮泛肥美也至來年正月  
間斫剔去枯摧細枝雖大條之長者亦斫去其半卽  
氣浹而葉濃厚矣大率斫桑要得漿液未行不犯霜  
雪雨斫之乃佳若漿液已行而斫之卽滲溜傷損最  
宜也纔斫了便鉏開根下糞之謂之開根糞則是每  
歲兩次鉏糞耳

士農必用種藝之宜惟在審其時月又合地方之宜使  
之不失其中栽培所宜春分前後十日十月內並爲  
上時春分前後以及發生也十月號陽  
月又曰小春木氣長生之月故宜栽培以養元氣此  
洛陽方在左千里之所宜其他地方隨時取中可也  
桑者易生之物嘗於長安試地桑除十一月不生活  
餘月皆可然春時及寒月必於天氣晴明巳午間藉

其陽和如其栽子已出元土忽變天寒風雨以熱水  
調泥栽培之熱月則必待晚涼仍預於園內稀種雜  
或麻黍  
爲蔭

士農必用養樹桑法牆圍成園大小隨人所欲將園內  
地耕斷熟方三尺許掘一坑坑之方深下糞水與栽地桑法同將畦

內種出荆桑全條連根掘出栽培亦如前法但所築

實土與地平上復用土封身一二尺周圍自成環池

無雨則澆待桑身長至一丈人高割去梢子則橫條自長

任令滋長休科去新條當春不宜科科了數年不旺十二月內或次年正月科則不妨如澆治

有功至秋可長大如壯椽十月內或次年春可移爲

行桑若不如此於園內養或從小便栽爲行桑者多被風雨孳畜損壞野荆桑不成



身者移根於園內養之亦同

栽培如地桑法芽出畱旺者一條長至如大人

高其科養如前

種樹書午日不得鋤桑

案凡澆灌須離桑三二尺澆之其功倍若落葉後必須澆灌濃糞謂之謝桑糞惟二三月中有葉在上則斷不可澆澆之蠶食則漲死

又案桑下種植惟菜豆小豆最爲益桑菜亦無傷若種煙斷不可其味辣薰之在上蠶食之必死

又案夫桑地田間野外城邊市角無不可種惟

人家有燒煤則一方之地多可不種煤煙一起  
葉面上如墨不可飼蠶

齊民要術須取栽者正月二月中以鉤杙壓下枝令著

地條葉生高數寸仍以燥土壅之

土濕則爛

明年正月中

截取而種之

住宅上及園畔者固宜卽定其田中種者亦如種樅法先概種二三年然後更

移

務本新書寒食之後將二年之上桑全樹以免撼祛定  
掘地成渠條上已成小枝者出露土上其餘條樹以  
土全覆樹根周圍撥作土盆旱宜頻澆如無元樹止  
就桑下腳窠依上掘渠埋壓六月不宜全壓

士農必用春氣初透時將地桑邊傍一條梢頭截了三

五寸屈倒於地空處

多用栽子多屈幾條隨人所欲

地上先兜一渠

可深五指餘臥條於內用鉤掘子攀釘住

條短則二箇長則三

箇

懸空不令著土其後芽條向上生如細杞齒狀橫

條上約五寸畱一芽其餘剝去

可飼小蠶

至四五月內晴

天巳午時間橫條兩邊取熟澆土擁橫條上成壠橫

條卽爲臥根至晚澆其根科

當夜臥根生須

至秋其芽條皆

爲條身至十月

或次年春分前後

際臥根根頭截斷取出隨

間空處斫斷

一如拐子樣

每一根爲一栽

此法萌芽幾子無窮

陳旉農書一種海桑本自低亞若欲壓條卽于春初視

其低近根本處條以竹木鉤釘地中上以肥潤土培之  
之不三兩月生根矣次年鑿斷徙植尤易於種甚也  
務本新書秋暮農隙時分預掘下區藉地氣經冬藏濕  
又分減栽時併忙區方深各二尺之上熟糞一二升  
與土相和納於區內土宜北高南下以畱冬春雨雪  
餘區臘月內揀肥長魯桑條三二根通連爲一窠快  
準此斧斫下卽將楂頭於火內微微燒過每四十五條與  
稗草相間作一束臥於向陽院內院深長三四尺當  
凍難掘以土厚覆春分已後取出卻將元區跑開下水  
三四升布粟三二十粒將條盤曲以草索繫定臥栽

區內覆土約厚三四指如或出露條尖三二寸覆土宜厚尺餘俱當堅築仍以虛土另封條尖已後芽生虛土自充先於區南種棘地宜陰濕時時澆之若全臥栽者已後逐旋添土芽條長高斫去傍枝三年可以成樹或就作地桑

務本新書據埋頭栽桑斫下桑梢相連三二枝爲一窠栽如前法或於蘿蔔內穿過一枝假借氣力更妙掘區堅埋依前法

務本新書墾種桑條秋耕熟地二月再擺勻東西起場約量遠近墾土爲區將臘月元埋桑條栽依前法或

是單根長桑條依上栽之亦可

務本新書栽種桑條者若舊桑多處可以多斫萌條若  
是少處又慮斫伐太過次年誤蠶故具種樁壓條栽  
條之法三者擇而行之

士農必用插條法牆圍成園掘坑如地桑法大葉魯桑  
條上青眼動時科條長一尺之上截斷兩頭烙過每

一坑內微斜插三二條

栽培如地桑法

待芽出封堆虛土三

五寸每一根科止畱一條至秋可長數尺次年割條

桑葉飼蠶

止怕當年三伏日澆蔭不  
關無不活者畦內插亦可

如當處無可採

之條預於他處擇下大葉魯桑臘月割條藏於土穴

如藏花果接頭透風則乾了候至桑樹條上青眼微動時開穴所

藏條上眼亦動但黃截烙栽培用度如前

齊民要術桑栽大如臂許正月中移之亦不須率十步一

樹陰相接則妨禾豆行欲小倚角不用正相當

士農必用園內養成荆魯桑小樹如轉盤時於臘月內

可去不便枝梢小樹近上畱三五條椀口以上樹畱

十餘條長一尺以上餘者皆科去至來春桑眼動時

連根掘來於漫地內闊八步一行行內相去四步一

樹相對栽之栽培澆灌如前法桑行內種田闊八步

地四步已久可成大樹相對者則可以橫耕故田不廢墾桑不致荒也荆棘圍護當年

橫枝上所長條至臘月科令稀勻得所至來春便可

養蠶野桑成身者即可移栽

畱橫枝如前法一名一生桑其根平淺故不久

自死轉盤換根則長旺又久遠也農家移栽為轉盤桑同果樹一移一旺舊根斫斷新根即生新根不平生向下生也以此故長旺久遠

齊民要術凡耕桑田不用近樹

傷桑破犁所謂兩失

其犁不著處

斫地令起斫去浮根以蠶矢糞之

去浮根不妨棲犁令樹肥茂也

齊民要術又法

歲常繞樹一步散蕪菁子收穫之後放豬咬之其地柔軟有勝耕者

種禾

豆欲得逼樹

不失地利田又調熟遠樹散蕪菁者不勞逼也

務本新書桑隔內修蒔宜淨使透風日則桑決榮茂萬

一有步屈等蟲又易捕打冬春之際免野火延燒



務本新書備春旱者秋深預於桑下約量擁糞經冬地  
氣藏濕柔亦榮旺春月撥作土盆雨則可聚旱則可鋤鋤治桑  
隔自然耐旱又辟蟲傷瀕河近井若能一澆亦不失  
節

務本新書備桑災者三月間儻值天氣陡寒北風大作  
先於園北審當日風勢多積糞草待夜深發火煨熅  
假借烟氣順風以解霜凍

士農必用樹桑之病荒桑晚則與蠶生之日不相及爲  
蠶事者必當開墾其田科斫其桑使之滋長成條次  
年與蠶生自不相遠

韓氏直說桑樹腳科竝浮根依時皆可斷去可做栽子者依法栽之不妨耕種其桑自然根深耐旱葉早生榮茂

沈氏農書正月宜種桑秧修桑刮蟻二月桑樹剪桑三月澆桑秧刮二蟻四月刈地謝桑倒花草田壓桑秧倒地剪桑澆桑秧看三蟻五月刈地澆桑秧拔桑附枝六月捏定枯桑葉七月捏二蟻脩桑把桑八月捉蛀蟲九月勒葉捉蛀蟲十月買枯葉十一月刮蟻十二月修桑刮頭蟻斫樹枝

齊民要術剗桑十二月爲上時正月次之二月爲下

白汁

出則損葉大率桑多者宜苦斫桑少者宜省斫秋斫欲苦

而避日中觸熱樹澆枯冬春省斫竟日得作

士農必用樹桑惟在稀科時斫依時使其條葉豐腴而

早發不致蠶之穉也稀則條自豐葉自腴今年科不

然早發而

士農必用斫樹法自移栽時長五七尺高便割去稍既不留

中心其條自向外長大中心可容立一人如長成樹

者當中有身及枝者亦可斫去

士農必用科條法凡可科去者有四等一瀝水條向垂者

一刺身條自裏生者一駢指條相併生者一冗脰條雞順

獨臘月爲上正月次之臘月津液未上又農隙人家春科只圖容易剥皮卻損了  
津液也欲用桑皮將臘月正月科下條惟在時之和  
向陽土內培了至二月中取之自可剥融手之審密封繫之固擁包之厚使不致疎淺而寒  
凝也

齊民要術春採者必須長梯高杙數人一樹還條復枝

務令淨盡要欲旦暮而避熱

梯不長高枝折人不多上下勞條不還折人曲

採不淨鳩脚多旦暮採令潤澤不避熱條葉乾

秋採欲省裁去妨者

秋多採則損條

陳旉農書若欲縛卽別取好桑直上生條不用橫垂  
生者三四寸長截如接果子樣接之其葉倍好然亦  
易衰不可不知也湖中安吉人皆能之

農桑輯要廢樹老樹也謂枝榦豐大條短葉薄不能復滋長者

農桑輯要附地鋸斷於砧盤上肌肉內附骨用竹篦子

插下可深一寸半

或插或釘竹篦子大小比接頭劈半樣一面薄背一面平也削成馬

耳狀用時喻養溫和插時平面附骨鋸過處砧盤堅木爲骨皮肉骨外青輭者爲肌肉鋸用細齒者齒齧

傷肌

接頭可長五寸之上

其眼視青者

根頭一寸半用薄

刃刀子刻下中半刻成判官頭樣餘半削其骨成馬

耳狀又與刻下處相照蒲背上用刀子遏斷浮皮剝

去顯露肌肉

輕遏不可傷肌肉

又將馬耳尖頭薄骨割去半

分青肌肉自長於骨尖半分也將接頭喻養溫暖假

借人之生氣易活

人於其時不可喫酒及濃厚滋味物

取出篋子置用

青肌肉半分裹接頭馬耳尖插下極要嵌密每砧盤

上插二條或三條

令接頭之骨與樹之骨相著肌肉與樹之肌肉相著木之津液行于肌肉之間如不相對著又不緊密多不活如不用半

分肌肉裹馬耳尖則擦了肌肉故亦有不活者用

新牛糞和土爲泥封泥了濕土封堆

大小斟酌其樹盤

接頭

頂上可畱一二眼土厚三四寸周圍棘刺遮護接頭

生芽條出土長高一二尺約量畱三二條其餘剝去

傍埋椽子一條爲依柱芽條漸長用繩子葛條總繫

在柱上

不如此被風雨擺折

芽條漸長壯止可畱二條後爲雙

身樹也當年可長八九尺一丈至大人高時截去桑

梢橫枝自長勿採割至臘月內科截橫條每一身可  
畱三四枝各長一尺然不可拘定或可長明年爲柯  
柯上起條採令稀勻至秋成樹劈接亦可

農桑輯要又法掘土見根將橫根圍一遭斧斫斷掘去

中間正根將周圍根楂細鋸子截成砧盤每一砧盤

或劈接或插接二三接頭

斟酌砧盤大小細根不堪接者勿用封堆等如前法

芽條出土若太稠密則間令得所至來年止畱一條

大者于本地其餘分出爲栽子于別地栽之

用依柱如前

農桑輯要先附地平鋸去身榦于砧盤傍向下一寸半

皮肉上用快刀子尖向上左右斜批豁兩道至平面

其下尖其上闊一指中間批豁斷者剔去

其批豁了處如一鴉

子樣渠子也兩壁有斜而無平底其尖淺向上漸深至平面可深至半指許

接頭可長五

寸其粗細如一指許者于根頭一寸半內量畱一半

將其外一半左右削兩刀子成蕎麥楞樣令頭尖口

內噙養溫暖嵌于砧盤傍所批渠子內極要緊密須

使老樹肌肉與接頭肌肉相對著于一砧盤上如此

接至數箇

斟酌盤大小

用新牛糞土泥封泥了所繫桑皮

然後用濕土封堆接頭上可厚五寸

大小斟酌其樹盤

周圍

棘刺遮護接頭上條芽出土長高一二尺約量畱三

二條用依柱如前



農桑輯要可就于橫枝上截了畱一尺許

然尺寸不可拘定惟取樹

勢圓也

于接頭上眼外方半寸刀尖刻斷皮至骨款揭

下帶眼皮肉一方片

其眼底骨上一小心子如米粒此是一芽生氣之根揭時用指

甲尖刻起令其小心子帶于皮肉之上

口噙少時取出印濕痕于四圍

刻斷皮肉揭去露骨將接頭上靨皮嵌貼上

其眼向上勿令

顛上下兩頭用新細薄桑皮繫了

斟酌其緊慢太緊則生氣不通太慢

則不相附著俱難活也

用牛糞和泥眼四邊泥了其所貼之靨

多少可量其樹之大小

農桑輯要就畦內將種出荆桑隔年芽條去地三寸許

向上削成馬耳狀將一般粗細魯桑接頭亦削成馬

耳相搭細桑皮繫了牛糞泥封濕土擁培其芽條出土可畱一二芽至秋長如一大人高明年可移入園中養之其法如前

農桑輯要取藏接頭側近有接頭者臨接時取遠處有者預先于臘月節氣內割去其條其採取培養之法全如插條法內所說如取接頭處過遠者可于未曾盛油新柿篋中與蒲穰一處藏了外密封不透雖千里不致凍傷果木宜二年條其藏及接法亦同

農桑輯要附地接者封泥擁培如前半身截成砧盤接者但其縫罅上用紙封又用破席片包裹如仰盆子樣內盛潤土培養其接頭勿令透風用無底瓦罐盆子代席片亦可

土乾則灑水所包土上條芽長出其所包土亦休取

去至秋條長成接處長定所包土不用也

如接頭都活則斟酌量

橫枝多少樹之氣力留之

爾雅蟻齧桑

注似天牛長角體有白點喜齧桑樹作孔入其中

爾雅螟蛉桑蟲褐桑蠹

農桑要旨害桑蟲蠹不一蠹蛛步屈麻蟲桑狗爲害者

當生發時必須於桑根周圍封土作堆或用蘇子油

於桑根周圍塗掃振打既下令不得復上卽蹉撲之

或張布幅下承以篩之野蠶爲害者蟲與家蠶同眠

起小時不爲害欲大眠時將應有五六日內飼蠶桑

併力收斫連枝積貯不令日氣曬炙其野蠶當斫時  
自然振落縱有畱者亦因積貯蒸死一二日桑葉萎  
輒當旋旋剝下切細以溫鹽水拌飼之不惟其葉生  
新抑鹽性涼於蠶有益不然遲於收斫三日內野蠶  
大眠起桑葉必盡爲所食家蠶又何望乎又有蜣蜋  
蟲性如蠶蛛晝潛於上夜出食葉必須上用大棒振  
落下用布幅承聚於上風燒之桑間蟲聞其氣卽自  
去以上蟲蓋食葉者也又有蠹根食皮而飛者名曰  
天水牛於盛夏時生皆沿樹身匝地生子其子形類  
蛆蛭樹膏脂到秋冬漸大蠹食樹心大如螻蛄至三

四月間化成樹螭卻變天水牛故其樹方秋先發黃  
葉經冬及春必漸枯死除之之法當盛夏食樹皮時  
沿樹身必有流出脂液濕處離地都無三五寸卽以  
斧削去打死其子其害自絕若已在樹心者宜以鑿  
剔除之凡諸害桑蟲蠹皆因桑割荒蕪而生以致累  
及熟桑使盡修築下爲熟地必無此害桑蟲蠹也  
蠹經桑之害有桑牛尋其穴洞油抹之卽死或以蒲母  
草沃之狀如竹葉桑之癩也亦以草汁沃之桑之下  
可以藝蔬不可以楊楊多楊甲蟲食桑皮而子化其  
中則蟲族滋生而爲蠹

沈氏農書刮蟻須三番冬春看頭蟻清明看二蟻剪桑  
畢看三蟻

務本新書假有一村兩家相合低築圍牆四面各一百

步

若戶多地寬  
更甚省力

一家該築二百步牆內空地計一萬

步每一步一桑計萬株一家計分五千株若一家孤

另一轉築牆二百步牆內空地止二千五百步依上

一步一桑止得二千五百株

其功利不  
侔如此

恐起爭端當

於園心以籬界斷比之獨力築牆不止桑多一倍亦

遞相藉力容易句當

桑志卷第六

桑志卷第七

海鹽李聿求五峯甫簍

取材

取榦稱于周禮鳩食咏于葩經桑之用煩矣則  
器用食物之所需析言之要亦未可略也志取

材第七

詩豳風徹彼桑土毛亨傳桑土桑根也

詩小雅樵彼桑薪

周禮考工記凡取榦之道柘爲上壓桑次之

儀禮士冠禮髻笄用桑



禮內則桑弧蓬矢

禮雜記曰以栲杵以梧枕以桑

公羊傳虞主用桑

易通卦驗夏至日瑟用桑木長五尺七寸

韓詩外傳原憲居魯桷桑無樞

遼史儀衛志商人以桑根之瑞爲大輅

路史伏戲氏絙桑爲三十六絃之瑟

風俗通義桑車榆轂聲聞數里

拾遺記庖犧絲桑爲瑟

齊民要術桑十五年任爲弓材亦堪作履裁截碎木中

錐刀靶二十年好作犢車材欲作鞍橋者生枝長三尺許以繩繫旁枝木樞釘著地中令曲如橋十年之後便是渾成柘橋欲作快弓材者宜于山石之間北陰中種之其高原山田土厚水深之處多掘深坑之中種桑者隨坑深淺或一丈丈五直上出坑乃扶疎四散此樹條直異于常材十年之後無所不任

異苑東陽郡永康縣吳時有人入山逢大龜擔之歸遇夜攬舟于岸見老桑樹呼龜曰元緒女當死矣龜呼桑樹曰子明無苦也雖然盡東南之樵不能潰我對曰諸葛恪明敏禍必及于汝子二人也明日其將龜

獻吳王吳王命煮之三日三夜不死遂問諸葛恪恪  
曰此龜有精須多載老桑爲薪煮之立死遂命伐岸  
邊老桑樹爲薪煮之火燃龜卽糜矣

常新錄裴休得桑木根曰若作沉香想之更無異雖對  
沉水香反作桑根想終不聞香氣諸相從心起

杜光庭錄異記李德裕一旦有老叟謁門引五六輩昇  
巨木請謁焉曰某家藏此桑寶三世矣感公之好奇  
搜異是以獻耳木有奇寶若能者斲之必有所得洛  
邑有匠計其年齒且年或身已沒子孫亦當得其旨  
訣公如其言訪于洛下其子應召而來因解爲二琵琶

琵琶自然有白鴿羽翼爪足巨細畢備匠料之微失  
厚薄不中一鴿少其翼公以形羽全者進自畱其一  
詩衛風于嗟鳩兮無食桑葚

詩魯頌食我桑黹

魏略楊沛爲新鄭長課民益畜乾椹積得千餘斛藏在  
小倉會太祖爲兗州刺史西迎天子餘人皆無糧過  
新鄭沛謁見乃進乾椹太祖甚喜

晉書王道子問其西土所出張天錫應聲曰桑椹甜甘  
鴟鴞革響

北史六軍乏糧問計于崔暹暹曰飛鴟食葚而改音詩

稱其事可取以助糧帝乃聽人以甚當租

東觀漢記蔡君仲至孝王莽亂人相食君仲取桑椹赤黑異器賊問所以君仲曰黑與母赤自食賊義之

漢武內傳神仙上藥有扶桑丹椹

風俗通義楊範齊人齊宋之亂母在賊中範采椹藏于地夜取之進母如是非一忽地中得米十斛上有字云米十斛賜孝子楊範以資給母

世說新書有王甲從北方來詣謝公問北方何果最勝甲云桑椹最好謝公問可以比江東何果甲云是黃甘之流公曰君何乃爾妄語甲恐責乃買駿馬候熟

時取數千枚還以奉公公食之以爲美乃謂甲此味  
乃江東所無而君近比黃甘於是引甲爲賓客  
續博物志鳩食桑椹則醉

桑志卷第七

桑志卷第八

海鹽李聿求五峯甫簋

祥異

桑之木本常氣之感有異洪範庶徵極于庶草  
況桑爲日用之資非常木可等自漢以後見于  
五行符瑞志等書者俱可案時考也志祥異第  
八

竹書紀年成湯二十四年大旱王禱于桑林雨

漢書殷太戊亳有祥桑穀其生

三木台而共生

傳曰俱生乎朝

七日而大拱

兩手合爲拱

伊陟戒以修德木枯劉向以爲



桑猶喪也穀猶生也殺生之柄失而在下有草妖一  
曰野木生朝而暴長小人將暴在大臣之位危亡國  
家象朝將虛之應也

說苑成湯之後武丁時桑穀生于朝武丁懼飭身修行  
漢書元帝永光二年三月雨雪隕霜殺桑

後漢書獻帝興平元年九月桑復生堪可食臣昭曰桑

是木異必在濟民安知非瑞于時蒼生死敗周秦賊  
盡餓魂餒鬼不可勝言食此重堪大拯危命雖理附  
枝不能及若以爲怪則建武野  
谷旅生麻菽尤盛復是草妖邪

晉書武帝太康元年三月河東高平霜雹傷桑

晉書武帝太康二年三月河東隕霜害桑

晉書武帝太康六年三月齊郡臨淄等四縣樂安等八縣瑯琊等八縣河間等六縣高陽等四縣隕霜殺桑

晉書惠帝元康六年三月東海雨霜殺桑

晉書惠帝元康九年六月庚子有桑生東宮西廂日長尺餘甲辰枯死

晉書惠帝永康元年四月立皇孫藏爲皇太孫五月甲子就東宮桑又生于西廂是月壯武有桑化爲柏

晉書懷帝永嘉二年冬頃縣桑有聲如解

南齊書武帝永明二年護軍府外桑樹一株並有蠶絲

綿被枝莖

唐書高宗永淳元年定州大雨雹害桑

唐書憲宗元和九年三月隕霜殺桑

唐書穆宗長慶二年七月處州大水壞桑田大半

唐書宣宗大中三年春隕霜殺桑

宋史太祖建隆三年春棣州厭次縣隕霜殺桑

宋史太祖乾德二年四月桐州蝻蟲食桑

宋史太祖乾德三年四月開封府尉氏扶溝二縣風雹

害民田桑十損七八

宋史太祖開寶八年五月邢磁州風雹害桑

宋史太宗太平興國七年三月宣州霜雪害桑

宋史真宗咸平四年三月丁丑京師及近畿諸州風雪損桑

宋史真宗咸平九年太平軍紅橋連理又黃橋附桑枝而生

宋史真宗景德四年三月甲寅夕京師大風黃塵蔽日自大明府歷京畿害桑稼唐州尤甚

宋史仁宗至和二年河東自春隕霜殺桑

宋史高宗紹興七年霜殺桑稼

宋史高宗紹興二十一年池州建德縣定林寺桑生李實

宗史高宗紹興三十年五月畿縣于潛臨安湖州安吉等三縣山水暴出流民廬壞田桑人溺死甚衆

宋史孝宗淳熙十六年三月揚州桑生瓜櫻桃生茄此草木互爲妖也

金史哀宗正大五年四月鄭州大雨雹桑柘皆枯

元史世祖至元十七年海寧益都四郡隕霜殺桑

元史世祖至元二十七年六月棣州厭次縣大風雹傷桑

元史世祖至元二十九年三月濟南般陽等郡及恩州屬隕霜殺桑

元史成宗大德八年三月灤陽隕霜殺桑

元史成宗大德九年三月河間益都般陽三郡屬縣隕  
霜殺桑一百四十二萬七千餘株

元史成宗至大元年大名路隕霜殺桑

元史仁宗皇慶二年三月濟寧隕霜殺桑

元史仁宗延祐元年三月東都平陽等郡泰安曹濮等  
州大雨雪隕霜殺桑

元史仁宗延祐元年閏三月濟寧汴梁等路及隴州開  
州清城渭源諸縣隕霜殺桑

元史仁宗延祐五年雄德歸信縣隕霜殺桑

元史仁宗延祐七年八月延津縣大風晝晦桑隕者十八九

元史英宗至治三年衛西路大風桑彫

元史順帝元統二十三年三月東平路須城東阿陽穀三縣隕霜殺桑

元史順帝至正三年四月兩都桑葉皆生黃色龍文

桑志卷第八

桑志卷第九

海鹽李聿求五峯甫簣

品題

體物瀏亮緣情綺靡故樂府紀事亦間錄之而  
博收節取胥歸體要志品題第九

繁欽桑賦上似華蓋紫極比形下象鳳闕萬桷一盈叢  
枝互出乃錯乃并爰爰隆暑涼風自生微條纖繞隨  
風浮沉陽蜩鳴其南枝寒蟬噪其北陰秋風忽其將  
來咸感節而悲吟玩庇陰之厚惠情眷眷而愛深

陸機桑賦皇太子便坐蓋本將直廬也初世祖武皇帝



爲中壘將軍植桑一株世更二代年漸三紀扶疏豐  
衍抑有瑰異焉夫何佳樹之洪麗超托居乎紫庭羅  
萬根以下洞矯千條而上征豈民黎之能植乃世武  
之所營故其形瑰族類體豔衆木黃中爽理滋榮煩  
縟綠葉興而盈尺崇條蔓而曾尋希太極以延峙映  
承明而廣臨革飛鶚之流響想鳴鳥之遺音惟歷數  
之有紀恒依物以表德豈神明之所相將我皇之先  
識誇百世而勿翦超長年以永日

潘尼桑賦從明儲以省膳憇便房以偃息觀茲樹之特  
偉感先皇之攸植蔚蕭森以四射邈淇庸而端直爾

乃徘徊周覽俯仰逍遙俛睨靈根上眺脩條洞芳泉  
于九壤台溢露于清霄倚增城之飛觀拂綺窗之疏  
寮下迢遞以極望上扶疎而參差匪衆鳥之攸萃相  
鳳凰之羽儀理有微而至顯道有隱而應期豈皇晉  
之貞瑞兆先見而啟茲起尋抱于織臺崇萬簣于始  
基

傳咸桑賦世祖昔爲中壘將軍于直廬種桑一株迄今  
三十餘年其茂盛不衰皇太子入朝以此廬便坐伊  
茲樹之僥倖蒙生生之渥惠降皇躬以斯植遂宏茂  
于聖世厥茂伊何其大連尋修柯遠揚洪條梢慘布

繁枝之沃若播密葉之垂陰蔭華寓以作涼清隆暑  
之難任以厥樹之巨偉登九日于朝陽且積小以高  
大生合抱于毫芒猶帝道之將升亦累德以彌光湯  
躬禱于斯林用獲雨而興商惟皇晉之基命爰于斯  
而發祥從皇儲于斯館物無改于平生心惻切以興  
思思有感于聖明步徬徨以周覽庶髣髴于儀形

拾遺記皇娥歌天清地曠浩茫茫萬象迴薄化無方洽  
天蕩蕩望蒼蒼乘桴輕漾著日傍當其何所至窮桑  
心知和樂悅未央俗謂遊樂之處爲桑中也詩衛風  
云期我乎桑中蓋此類也

宋子侯董嬌嬈洛陽城東路桃李生路傍花花自相對  
葉葉自相當春風東北起花葉正低昂不知誰家子  
提籠行採桑纖手折其枝花落何飄颺請謝彼妹子  
何爲見損傷高秋八九月白露變爲霜終年會飄墮  
安得久馨香秋時自零落春月復芬芳何時盛年去  
歡愛永相忘吾欲竟此曲此曲愁人腸歸來酌美酒  
挾瑟上高堂

無名氏羅敷行日出東南隅照我秦氏樓秦氏有好女  
自名爲羅敷羅敷善蠶桑采桑城南隅青絲爲籠系  
桂枝爲籠鉤頭上倭墮髻耳中明月珠綳綺爲下裙

紫綺爲上襦行者見羅敷下擔捋髭鬚少年見羅敷  
脫帽著幘頭畊者忘其犁鋤者忘其鋤來歸相怨怒  
但坐觀羅敷使君從南來五馬立踟躕使君遣吏往  
問是誰家姝秦氏有好女自名爲羅敷羅敷年幾何  
二十尙不足十五頗有餘使君謝羅敷寧可同載不  
羅敷前致詞使君亦何愚使君自有婦羅敷自有夫  
東方千餘騎夫婿居上頭何用識夫婿白馬從驪駒  
青絲繫馬尾黃金絡馬頭腰中鹿盧劍可值千萬餘  
十五府小吏二十朝大夫三十侍中郎四十專城居  
爲人潔白晳髮鬋頗有鬢盈盈公府步冉冉府中趨

坐中數千人皆言夫婿殊

曹植豔歌行出自薊門北遙望胡地桑枝枝自相值葉  
葉自相當

傳元豔歌行日出東南隅照我秦氏樓秦氏有好女自  
字爲羅敷首戴金翠飾耳綴明月珠白素爲下裾丹  
霞爲上襦一顧傾朝市再顧國爲墟問女居安在堂  
在城南居青樓臨大巷幽門結重樞使君自南來馴  
馬自踟躕遣吏謝賢女豈可同行車斯女長跪對使  
君言何殊使君自有婦賤妾有鄙夫天地正厥位願  
君改其圖

陸機羅敷豔歌扶桑升朝暉照此高臺端高臺多妖麗  
浴房出清顏淑貌耀皎日惠心清且閒美目揚玉澤  
蛾眉象翠翰鮮膚一何潤秀色若可餐窈窕多容儀  
婉媚巧笑言暮春春服成粲粲綺與紵金雀垂藻翹  
瓊佩結瑤璫方駕揚清塵濯足洛水瀾藹藹風雲會  
佳人一何繁南崖充羅幕北渚盈軒軒清川含藻景  
高岸被華丹馥馥芳袖揮泠泠纖指彈悲歌吐清響  
雅韻播幽蘭丹唇含九秋妍迹凌七盤赴曲迅驚鴻  
蹈節如集鸞綺態隨顏變沉姿無定源俯仰紛阿那  
顧步咸可歡遺芳結飛颺浮景映清滍冶遊不足詠

春遊良可歎

古樂府采桑渡蠶生春三月春桑正含綠女兒采春桑  
歌吹當春曲冶遊采桑女盡有芳春色姿容應春媚  
粉黛不加飾繫條采春桑采桑何紛紛采桑不裝鉤  
牽壞紫羅裙語歡稍養蠶一頭養百塢奈當黑瘦盡  
桑葉常不周春月采桑時林下與歡俱養蠶不滿百  
那得羅繡襦采桑盛陽月綠葉何翩翩攀條上樹表  
牽壞紫羅邊偽蠶化爲繭爛漫不成絲徒勞無所獲  
養蠶持底爲

謝靈運種桑詩詩人陳條柯亦有美攘剔前修爲誰故



後事資紡績常佩知方誠愧微富教益浮陽驚嘉月  
藝桑迫閒隙踈欄發近邨長行達廣場曠流始赴泉  
湏塗猶跬迹俾此將長成慰我海外域

鮑照采桑詩季春梅始落女工事蠶作采桑淇水間還  
戲上宮閣早蒲時結陰晚篁初解箨藹藹雲滿閨融  
融景盈幕乳燕啄草蟲巢蠶拾花萼是節最暄妍佳  
服又新爍浩歎對迴塗揚歌弄場藿抽琴試抒思薦  
佩果成託承君郢中美服義久心諾衛風古愉豔鄭  
俗舊浮薄靈願悲渡湘宓賦笑渥洛盛明難重來淵  
意爲誰涸君其且調絃桂酒妾行酌

簡文帝采桑詩春色映空來先發院邊梅細萍重疊長  
新花慙亂開連珂往淇上接憶至叢臺叢臺可憐妾  
當窗望飛蝶忌趺行衫領熨斗成裙襖寄語采桑伴  
訝今春日短枝高攀不及葉細籠難滿年年將使君  
慙亂遣相聞欲知琴裏意還贈錦中文何當□□日  
還作入山雲重門皆已閉方知畱客袂可憐黃金絡  
複以青絲繫必也爲人時誰畏夫壻□

吳均采桑詩賤妾思不堪采桑渭城南帶減連枝繡髮  
亂鳳凰簪花舞依長薄蛾飛愛綠潭無由報君信流  
涕向春蠶

吳均陌上桑嫋嫋陌上桑  
蔭陌復垂塘長條繫白日細  
葉隱鸝黃蠶飢妾復思拭淚  
且提筐故人寧知此離  
別煎人腸

王筠陌上桑人傳陌上桑未曉  
已含光重重相蔭映軟  
弱自芬芳秋胡始倚馬羅敷未滿筐  
春蠶朝已老安  
得久徬徨

蕭子顯陌上桑令月開和景處處動春心  
挂筐須葉滿  
息倦重枝陰日出秦氏樓條垂露尙盈蠶  
饑心自急  
開簾妝不成

王臺卿陌上桑鬱鬱陌上桑盈盈道傍女  
送君上河梁

拭淚不能語鬱鬱陌上桑遙遙山下蹊君去戍萬里  
妾來守空閨鬱鬱陌上桑皎皎雲間月非無巧笑姿  
皓齒爲誰發鬱鬱陌上桑裊裊機頭絲君行且宜返  
今夕是何時

蕭子範羅敷行城南日半上微步弄妖姿含情動燕俗  
顧景笑齊睂不憂桑葉盡還憶畏蠶饑春風若有顧  
惟願落花遲

沈君攸采桑詩南陌落花移蠶妾畏桑萎逐便牽低葉  
爭多避小枝摘駛籠行滿攀高腕欲疲看金卻舉意  
求心自可知

劉邈萬山見采桑人倡女不勝愁結束下青樓逐伴西  
口路相攜南陌頭葉盡時移樹枝高乍易鉤絲繩挂  
且脫金籠寫復收蠶饑日已暝詎爲使君畱

陳後主采桑詩春樓髻梳罷南陌競相隨去後花叢散  
風來香處移廣袖承朝日長鬟礙聚枝柯新攀易斷  
葉嫩摘前萎采繁鉤手弱微汗雜妝垂不應歸獨早  
堪爲使君知

張正見采桑春樓曙鳥驚蠶妾候初晴迎風金珥落向  
日玉釵明徒顧移籠影高攀動釧聲葉高知手弱枝  
軟覺身輕人多羞借問年少卻逢迎恐疑夫壻遠聊

復得專城

傳緯采桑羅敷試采桑出入城南傷綺裙映珠玕絲繩  
提玉筐度身攀葉聚聳腕及枝長空勞使君問自有  
侍中郎

賀徹采桑蠶妾出房櫳結伴類花叢度水春衫綠映日  
晚妝紅釧聲時動樹衣香自入風鉤長嫩枝曲葉盡  
細條空競采須盈手爭歸欲滿籠自憐公府步誰與  
少年同

徐伯陽賦得日出東南隅朱城璧日啓朱扉青樓含照  
本暉暉遠映陌上春桑葉斜入秦家細綺衣羅敷妝

粉能佳麗鏡前新梳倭墮髻圓籠裊裊挂青絲鐵鉤  
冉冉勝丹桂蠶饑日晚慙生愁勿逢使君南陌頭五  
馬停珂遣借問雙臉含嬌特好羞妾墻府中輕小吏  
卽今日往專城裏欲識東方千騎歸藹藹日暮紅雲  
起

高允羅敷行邑中有好女姓秦字羅敷巧笑美回盼鬢  
髮復凝膚腳著花文履耳穿明月珠頭作墮馬髻倒  
枕象牙梳娉娉善趨步襜襜曳長裾王侯爲之顧駟  
馬自踟躕

丁六娘十索二八好容顏非意得相關逢桑欲采折尋

枝倒懶攀欲呈纖纖手從郎索指環

李白陌上桑美女渭橋東春還事蠶作五馬如飛龍青  
絲結金絡不知誰家子調笑來相謔妾本秦羅敷玉  
顏豔名都綠條映素手采桑向城隅使君且不顧況  
復論秋胡寒蟬愛碧草鳴鳳棲青梧託心自有處但  
怪傍人愚徒令白日暮高駕空踟躕

李白子夜吳歌秦地羅敷女采桑綠水邊素手青條上  
紅妝白日鮮蠶飢妾欲去五馬空畱連

常建春詞翳翳陌上桑南枝交北堂美人金梯出素手  
自提筐非但畏蠶飢盈盈嬌路傍



張祜楊下采桑飛絲惹綠塵軟葉對孤輪今朝入園去  
物色強著人

王建采桑鳥鳴桑葉間葉綠條復柔攀看去手近撒下  
長長鉤黃花蓋野田白馬少年遊所念豈回顧良人  
在高樓

張仲素春閨思裊裊城邊柳青青陌上桑提籠忘采葉  
昨夜夢漁陽

鄭谷采桑曉陌攜籠去桑林路隔淮何如鬪百草賭去  
鳳頭釵

郭璞帝女桑贊爰有洪桑生濱淪潭厥圍五丈枝相交

參園客是采帝女所蠶

桑志卷第九

桑志卷九

十 虎溪山房

桑志卷第十

海鹽李聿求五峯甫簾

叢話

十畝閑閑大雅樂道言有可傳輒成佳話古人  
于桑三致意焉而瑣言軼事有足見重于藝林  
者用編于末志叢話第十

易否繫于苞桑

左傳公子重耳出奔及齊齊桓公妻之將行謀于桑下  
蠶妾在其上聞之以告姜氏姜氏殺之

左傳趙宣子田于首山舍于翳桑注翳桑桑之多蔭翳

者

左傳屈巫聘于齊申叔跪從其父將適郢遇之曰異哉  
夫子有三軍之懼而又有桑中之喜宜將竊妻以逃  
也

左傳齊高固入晉師桀石以投人禽之而乘其車繫桑  
本焉以徇齊壘

戰國策堯見舜于草茅之中席隴畝而蔭庇桑陰移而  
受天下

春秋元命苞姜嫄遊閼宮其地扶桑履大人迹生稷

春秋孔演圖孔子母徵在遊大豕之陂睡夢黑帝使請

已往交語曰女乳必于空桑之中

史記楚邊邑女與吳邊邑女爭桑二女家怒相滅兩邑  
長聞之怒而相攻滅吳之邊邑吳王怒遂伐楚

史記竇后弟竇廣國爲人略賣聞皇后新立少嘗與姊  
采桑墮用爲符信上書自陳

後漢書魯恭拜中牟令郡國螟傷界犬牙緣界不入中  
牟河南尹袁安聞之使仁恕掾肥親往廉之恭隨行  
阡陌俱坐桑下有雉過止其傍傍有童兒親曰兒何  
不哺之兒言雉方將雛親瞿然起

後漢書申屠蟠因樹爲屋注依桑樹爲棟也

謝承後漢書汝南伊昆爲汝陰縣功曹令新到官日園中有桑以食蠶何如昆曰非初至所務

蜀志先主舍東南角有桑樹生高五丈餘遙望幢幢如小車蓋先主少時與宗中諸兒于樹下戲言吾必當此羽葆車蓋

蜀志龐統字士元少時未有識者司馬徽有知人之鑒士元往見徽徽采桑樹上坐士元樹下共談晝至夜微異曰生當爲南州士人之冠冕

吳志羊祜五歲時令乳母于東家桑中探得金環是前身所藏

南齊書韓伯係襄陽人也襄陽士俗鄰居種桑界上爲誌伯係以桑枝蔭妨他地遷界上開數尺鄰畔侵之伯係改種鄰人慚愧

南史齊高帝舊宅在武進縣宅南有一桑樹擢本三丈橫出四枝狀如華蓋帝年數歲好戲其下從兄敬宗曰此樹爲汝生也

南史蕭矯妻羊字淑禕母嘗有疾淑禕于中夜祈禱忽見一人在樹下自稱枯桑

南史沈慶之履行園田每農桑劇月無人從行遇之者不知三公也

唐書南蠻傳桑維翰初舉進士主司惡其姓以爲桑喪  
同音維翰慨然乃著日出扶桑賦以見志

宋史杜生不出門三十年黎陽尉孫軫問不出門之因  
笑曰以告者過也指門外一桑曰憶十五年前亦曾  
納涼其下何謂不出

金史有盜秋桑者主逐捕之盜以父自刺其足而曰秋  
桑例不禁采汝何得刺我訴縣孫德淵曰若逐捕而  
傷瘡必在後今在前乃自刺也盜遂引服

三國典略齊長廣郡人伐枯桑樹于中得死龍長尺餘  
識者以爲長廣齊太上皇本封也齊氏本德龍爲君



木枯龍死非吉徵也

列女傳陳辨女者陳國采桑女也晉大夫解君甫使于宋道過陳遇采桑之女止而戲曰汝爲我歌我將舍汝女乃歌曰墓門有棘斧以斯之夫也不良國人知之

列女傳秋胡子宦于陳五年乃歸未至其家見路傍有美婦人方采桑秋胡子悅之下車謂曰今吾有金願以與夫人婦人曰嘻妾采桑奉二親吾不願人之金秋胡子歸至家其母呼其婦至乃向采桑者也婦投河而死

列女傳齊宿瘤女者初閔王遊東郭百姓盡觀宿瘤女  
采桑如故王怪召問之對曰妾受父母教采桑不受  
教觀大王王曰此奇女也聘迎之

益都耆舊傳何祗夢桑生井中趙直占曰桑非井中之  
物桑字四十八君壽恐不過此祗年四十八而卒

呂氏春秋有仇氏女子采桑得嬰兒于空桑之中獻之  
其君命嬀人養察其所以然曰其母居伊水之上孕  
夢有神告之曰曰出水而東走無顧明日視曰出水  
告其鄰東走十里而顧其邑盡爲水身因化爲空桑  
故命之曰伊尹

列子晉文公欲伐衛公子鉏仰而笑公問何笑曰臣之  
鄰人有送其妻適私家者道見桑婦悅而與之言然  
顧其妻亦有招之者矣臣竊笑此公悟其言乃止  
孫卿子孔子適楚于陳蔡之間七日不食曰居不隱者  
思不生身不佚者志不廣汝庸知不得之桑落之下  
淮南子趙宣孟活饑人于委桑之下而天下稱仁也  
淮南子曰出于陽谷浴于咸池拂于扶桑是爲晨明  
淮南子朝發搏桑日入落棠

漢武洞冥記東方朔以元封中遊鵩濛之澤忽見王母  
采桑于白海之濱

括地圖惜鳥先生避世于芒尙山其子居焉化民食桑  
三十七年以絲自裹九年生翼九年而死其桑長千  
仞蓋蠶類也去瑯琊二萬六千里

抱朴子川蟹不歸而蛄敗桑本見斷而蠹殄

博物志食桑者有緒而蛾

續齊諧記張成夜起忽見一婦立于宅南角曰明年必  
當令君蠶桑百倍

新論桂有蠹桑有蝎桂中藥而桑給蠶其用亦急與穀  
無異

古今注邯鄲有美女秦羅敷王仁妻仁爲趙王家令羅

敷出采桑陌上王登臺見而悅之因飲酒欲奪焉羅敷善彈箏作陌上桑以自明

鄴中記桑梓園中盡種桑三月三虎皇后宮人數千出桑遊其下

洛陽伽藍記洛中願會寺佛堂前生桑樹一株直上高五尺枝條橫遶柯葉旁有形如羽蓋復高五尺又葉凡爲五重每一重葉樞各異京師道俗謂之神桑

廣異記南方赤帝女學道得仙居南陽峯山桑樹上正月一日銜柴作巢至十五成或作白鵲或作女人赤帝見之悲慟誘之不得以火焚之卽昇天因名帝女

# 桑

荆楚歲時記正月十五日迎紫姑以卜蠶桑

水經注劉墮工釀自王公庶友牽拂相招者每云索郎有顧思同旅語索郎反語爲桑落也

鄴郡名錄杜勝宅以輭漆纏桑枝編爲籬障雨一過黑光照四面時通甫愛之欲以銅宮第取不應

見聞錄南唐溧水興天寺桑生木人長六尺如僧狀右袒而左跪衣襪皆備其色如純漆謂之須菩提縣掇置龕中以仁壽節來獻烈祖驚異迎至宮中奉祀甚謹

陶朱公書占桑葉貴賤只看正月上旬木在一日則爲蠶食一葉爲甚貴木在九日則爲蠶食九葉爲甚賤物理論正月朔占歲星上有青氣宜桑

便民書元日有霧主桑貴

通考二月十六日西南風主桑葉貴

種樹書常以三月三日雨卜桑葉之貴賤諺云雨打石頭徧桑葉三錢片或曰四尤甚杭人曰三日尙可四日殺我言四日雨尤貴

田家五行三月初三晴桑葉掛銀瓶雨打石頭斑桑葉錢上薙雨打石頭流桑葉好餵牛

桑志卷第十